

Saturday, November 29, 2025

Time - 2:30pm

CM

Uttar Pradesh state khawpui, Lucknow-a Bharat Scout & Guides kum 60 tlin lawmna leh 19th National Jamboree a ruala hman a ni a. He hun hi President Pi Droupadi Murmu chuan hmanpuiin Mizoram Chief Minister Pu Lalduhoma hnenah Bharat Scout & Guides chawimawina sang ber Silver Elephant Award hlan a ni.

Chawimawina lehkhaah hian Chief Minister Pu Lalduhoma hnena he chawimawina an pek chhan chu Bharat Scout & Guides hmalaknaa a thawh that chungchuan vang (Most Exceptional Service) a nih thu a inziak a ni.

Pu Lalduhoma chuan Mizoram mipui, khua leh tui tha, ram leh khawtlang tana inpe zo, midangte nena thawhho thiam, mahni inphata midangte tanpui tura inpeih reng thinte vangin chawimawina a dawng a ti a, A mimal hlawhtlinna ah a ngaih loh thu sawiin Mizoram mipuite hlawh chhuah zawk a ni a ti a, Mizorama Bharat Scout & Guides hotute leh Sports & Youth Services department te thawhrimnaah lawmthu a sawi bawk.

He chawimawina hi Mizo pasarihin an lo dawng tawh nia hriat a ni a. A dawng hmasa ber chu Pu Hrangthanga (L) niin kum 2000 khan a dawng a, Chief Minister hmaa a dawngtu hnunung ber chu Pi Lalrosangi niin kum 2017 khan a dawng a. Vawiinah Chief Minister hian a dawng ve leh ta a ni.

**TERRITORIAL ARMY**

Territorial Army, Aizawl Company Officer in Charge Lt. Col. Goldi Bora chuan Mizo Territorial Army lak hna tluang taka kalpui a nih thu leh kumthar January ni 18-ah written exam buatsaih a nih dawn thu a sawi.

Vawiina a pisaa chanchinbumite a kawmnaah he thu hi sawiin Lt. Col. Goldi Bora chuan Mizo Territorial Army atan mi 2700 chuanguin hming an pek thu leh heng zinga tam takin physical leh medical test paltlangin written exam an hmachhawn dawn thu a sawi a. A zat chiah chu an lakkhawm mek thu sawiin chiang zawka an tarlan thuai theih a beisei thu a sawi a. Territorial Army lak hna kalpui mek chu a felfai thu leh an hotute pawh an lawm thu a sawi a ni.

Lt. Col. Goldi Bora chuan Mizoram chhunga mi chi hrang hrangin an hna lak mek thalaiten an hriat theihna turin a thehlar lamah tan an lak nasat thu leh lawmawm a tih thu a sawi a. Mizo mipuite tanrualnaah lawmthu sawiin hna lak kawngah pawh harsatna liantham han sawi tur a awm loh thu leh a felfai thu a sawi a. Mizo hmeichhia tam takin an dil ve chu lawmawm a tih thu a sawi bawk a ni.

Lt. Col. Goldi Bora chuan Territorial Army hna lak mekah Mizoram Youth Commission in written exam hmachhawn tur te tan Crash Course an siam chu lawmawm a tih thu leh an mamawh ang resource pawh an theih anga an pek dawn thu a sawi a. Hna lak ringawt an buaipui loh thu leh Aizawla an rawn luh tirh atangin hmun hrang hrangah vantlanga tana thil tha tiin outreach hun hrang hrang 27 lai an huaihawt tawh thu a sawi a ni.

**CHAMPHAI LEGAL METROLOGY**

Champhai District Consumers Union leh Champhai Legal Metrology pisa te hmalaknain Mipui ten sa leh thlai hrang hrang te Buk tling ngei a an lei theih nan endik hna thawh a ni. An endikna hmun hi Champhai Bazar hrang hrang - Awmpui phei Bazar, Venglai Bazar leh Bethel Kawn Bazar -ah te niin Vawksa, Arsa, Bawngsa, Kelsa, Ui sa Sangha leh thlai zuartute Bukna an endikah, buk tlinglo leh Mau hmang a bukna siamchawp hmang thin mi 5 man an ni a, Legal Metrology office ah tih fel ngai tifei turin mi 7 an ko bawk. A bik in Bawngsa leh Vawksa bukna erawh a tling tha hle a ni.

Bazar hrang hrang bukna endiknaah hian Champhai Dist. Consumer Union President Pu C. Lalthawmliana leh OB dang Pa nga an tel a. Anni bakah hian Legal

Metrology Asst. Controller Pu Lalfakzuala leh Legal Metrology Inspector Pu Felix Lalruatsanga leh thawktu dang 4 an tel bawk a ni.



MANN KI BAAT

Prime Minister Narendra Modi chuan November ni 30 (Pathianni) hian Akashvani-a 'Mann Ki Baat' programme ah ram chhung leh pawna cheng mipuite hnenah thuchah a sawi dawn.

Prime Minister hian chawhma dar 11 ah thuchah sawi tanin he hun hi thla tina neih thin radio programme vawi 128-na tur a ni. He hun hi Akashvani leh Doordarshan network zawng zawng, AIR News website leh Newsonair mobile app-ah te pek chhuah a ni dawn bakah AIR News, DD News, PMO, leh Ministry of Information and Broadcasting te YouTube channel-ah te pawh live-a pek chhuah a ni dawn bawk. Hindi-a pek chhuah a nih zawh veleh hian Akashvani chuan tualchhung tawng hrang hrangin a pe chhuak zui nghal dawn a ni.

